

國朝詩人徵略

國朝詩人徵略卷四十六

番禺張維屏子樹輯

黎簡

字簡民號二樵廣東順德人貢生有五百四峰堂詩鈔

簡生粵西十歲能詩歸里益肆力於古其詩峻拔清峭刻意新穎足跡不踰嶺海內詞人想望風采名流來粵者咸折節下交簡才思敏妙兼工書畫書得晉人意畫直造元四家堂奧著有五百四峰堂詩鈔藥烟閣詞鈔芙蓉亭樂府注莊韻學

廣東通志

嶺南自三家後風雅寥寥比來余所知者張庶常  
錦芳馮戶部敏昌溫編修汝适潘舍人有爲趙大  
令希璜而簡民爲之冠性好山水屢入朱明洞天  
窮其幽勝朋儕罕有當意惟與德清許宗彥無錫  
孫爾準爲詩文交其詩峻拔清峭刻意新穎言人  
所不能言

湖海詩傳

時張葯房以詩名里中得二樵爲勅敵李南淵令  
潮陽見其詩曰必傳之作也造廬訪之於是二樵  
之名傾動一時己酉以選拔貢太學旋丁外艱繼  
得疾未赴

延試足跡不踰嶺海內名士想望風采恨不獲一見  
鉅公來粵者咸折節下之其詩意境幽峭吐屬深  
警戛戛獨造劇目怵心似非經營慘淡不能成一  
語者顧才思絕敏無論長篇短什援筆立就蓋其  
天姿旣高而又深造自得故雖縑幽鑿險如出天  
成方之葯房一奇一正旗鼓相當未可以意爲軒

輒也

嶺南四  
家詩鈔

二樵山人所居曰百花村有亭曰衆香有閣曰藥  
煙以婦善病而名之也山人襟情脫灑意趣蕭閒  
視花鳥若友朋以筆墨爲耒耜時往來仙城佛山

之間既登拔萃科當貢入成均將北行以事不果  
生平擅詩書畫三絕其詩由山谷入杜而取鍊於  
大謝取勁於昌黎取幽於長吉取豔於玉溪取瘦  
於東野取僻於閬仙鍾焉鑿焉雕焉琢焉於是成  
其爲二樵之詩其書意態欲追晉人中年兼學李  
北海晚年寫蘇黃兩家之體居多其畫一種蕭疎  
澹遠倣倪高士一種淋漓蒼潤蓋欲由梅花道人  
而問津於北苑也山人所寓求詩書畫者日填于  
門硯田所入頗豐足以自給既歿人得其手蹟珍  
逾球璧焉山人自稱樵夫又號石鼎道士

聽松廬  
文鈔

二樵先生詩甘苦得失自知之自言之其答同學  
云簡也於爲詩刻意輒新響當其跨步時語亦頗  
倜儻又與人論詩云士生古人後詎有不踐迹始  
則傍門戶終自監槩戟裨校轉渠帥揮叱赴巨敵  
一身數生死百戰資學識絕境無坦步高唱有裂  
筩彎弓石爲肉磨刀水先赤要於其發端真氣貫  
虹霓誦此數言可以知先生之詩矣

聽松廬詩話

二樵喜讀莊子詩亦多用莊子有句云老生所讀

書南華性之適

同上

世人望我我方閉門薜蘿幽深外有白雲此二樵

山人詩也余每於塵勞中誦此如一服清涼散又有句云清宵悠悠撫我鳴琴孰聽其曲自惜其心自惜其心四字道盡千古文人心事

同上

二樵詩好奇以七古論之有清奇者如湖上秋光濶無著約束結成明月團有雄奇者如刀色抱人不見人人乃聲出刀中央有瑰奇者如黃昏碧火行木客陰洞雄狐拜金馬有幽奇者如長狐嘯血成碧苔一絲冷夢尋不回語皆匪夷所思

同上

二樵詩多單句可味者五言如情真使人醉又積愛成至愚又孤心入萬象又天氣夜中分七言如

秋氣誰先與雲又吟詠氣平心有悔又一官纔  
罷百骸尊又漸減聰明願息機又賣文隨力飯饑  
人若此者皆耐尋繹同上

粵東黃梅天氣牆壁多出水二樵句云南風古牆  
汗又云南霧萬物濕語樸而鍊同上

粵東最怕旱二樵詩云廣州受旱無旱色旱甚水  
田猶一碧富兒不信山縣田乃有爰爰千里赤同上

二樵惟恐身後不傳其詩有云身前之名尙按劍  
身後之名同立錐二樵自知身後必傳其詩有云  
文章死則貴又云絕技原非死前寶絕技蓋兼書



畫言之同

二樵七律多幽新僻雋之作然亦有沉著者如牂  
牁一首云天上牂牁屬要津穀絲唇齒互相因猶  
聞重譯輸華夏何至堅關閉晉秦白虎壇臺勞大  
吏青燐風雨待耆民雲頭幾夜巉巖黑可洗西南  
赤地塵此憂旱詩也起二句言水本通津粵東資  
粵西之穀粵西資粵東之貨三四言海外尙來洋  
米何至鄰省不放穀船第五句言督撫求雨第六  
句言老羸多斃結二句言密雲不雨望愈切矣提  
筆寫來筆頭甚重樵夫固無所不能上

二樵力避平熟斧鑿太過遂有初稿極佳之詩經

屢改而致壞者同上

張黃黎呂之稱由於李南澗司馬南澗將死郵書至粵東云願乞張黃黎呂各製輓詩一篇於此可

見司馬與諸君交誼之篤

松軒隨筆

標題

華首臺至洗衲石

古五

水簾洞

古五

秋風

引寄二三故人

古七

人日歎

古七

與升父

論詩

古五

林哲侯彈琴詩

古七

望農

古五

射虎圖歌

古七

周生書來言王蘭泉近刻

湖海詩傳欲選拙詩

古五

九日許周生置

酒觀音山古七 韓東老置酒三元宮古七

自題覓句圖小影持贈平叔古五 長歌行

贈虛舟古七 趙渭川以漢瓦當及瓦當文

見寄古七

摘句 西日東流水無語各自急

萬響不成喧一靜吾自有

萬戶閉秋月家家有魂夢虛無生笑啼衆

幻作一闕我如寒巖僧身倚枯木凍潛處

諸妄界抱靜不敢動學道轉迷悶求悟亦

冥洞孤心自迴薄千古入收縱

萬物供獨坐寸心遊太初  
此身有大藥無病取微勞  
雨兼潮有信春及客爭程  
風長雲亦厭江濶月無依  
露靜叢葦白雨多空地青  
眼看逝者水吾亦古之人

海潮入村水三折水深花深地深極故人  
村口隨香風小艇衣裳濕春碧

生如草木眞爲死士有詩書亦可貧  
短長道路供離別少壯交遊半死生

治產我還師我法無田吾亦讀吾書  
生平今世斯爲盛學至中年喚奈何  
宋玉愁多秋送遠賈生年少古傷心  
士龍實是鸞鳳子帝虎虛縻犬馬年  
蛾子綢繆槐國雨鷄居蹭蹬魯門風  
不辨海含何處雨漸窺雲歛半池星  
到地雨融雲上雪隔花山擁霧中髯  
天許春工縱花鳥世容吾輩飯文章  
詩句隨時成掌故饑寒行處卽殊方  
殘年賤子無家別昨夢嬌雛哭母聲

直以病軀縈老友勉安慈母譽嬌兒  
今爾生來已憂患古賢傳者半風塵  
倘問樵夫故豪侈萬花園屋百城書  
乍語鏡臺如問病熟知人面作通家

燕子

千段深紅一團綠轉增揚柳盡情妍

桃花

### 臧法高

字憲庭號盧谿山東諸城人諸生有盧溪詩草

憲庭好吟詠專好爲七言律其自序有云聲不必  
鸞鳳家雞野鷺亦能成聲響不必黃鐘擊筑叩缶  
皆堪作響各適其適卽以各詩其詩而已其夢故

友句云人雖已故詩長在道卽終窮志不移此二

語如自寫其生平矣

聽松廬詩話

摘句 細草半遮沽酒路斷霞橫映養花天

鶴帶松陰留月砌蝶隨花氣入柴門

野浦煙涵漁舸小驛樓雲壓戍旗低

因憐白鶴時開籠爲愛青山不閉門

辟穀未能延歲月積書難必到兒孫

非因事佛畱禪榻却爲傷生掛釣竿

蝴蝶夢魂明月下鷓鴣詩思落花中

往來識面無新貴終始關情有故交

吳文溥

字博如號澹川浙江嘉興人貢生有南野堂集

丙辰秋按試至嘉興試畢將行有諸生獻其父詩  
南野堂集二帙舟中閱之知爲嘉興吳澹川文溥  
所作披吟終日定爲浙江詩士之冠關中草閩游

編尤爲直逼古人

定香亭  
筆談

陳鴻壽曰余年十二卽識吳丈澹川飄然如神仙  
中人能作蘇門之嘯時方自關中歸酒酣耳熱輒  
道遇赤脚仙事刺刺不休後涉臺海歸言

大兵征林逆時狀甚悉戊午同客濟南次年中丞師



撫浙同依幕下輪軒錄稿丈所校訂所著南野堂

筆記師貞備覽所見錄已刊行兩浙輶軒錄

澹川學有本源尤精韜略西諸侯爭延爲上客其

詩推陳出新一空凡響羣雅集

標題 田家雜興五古 盧生歌七古

摘句 同居不覺好臨別始相悲

風月似前世漁樵皆古民

鳥飛風未定人語月初生

一劍少年身許國千金破產客爲家

明年縱使花如舊未必看花君又來

王佩鍾

字穎川陝西三原人乾隆

年舉人官安塞

教諭有霍汀詩草

三原王穎川先生邃經義精篆法尤長詩古文詞

以名孝廉司鐸隴西秦州各邑出其所學教授士

子多所成就

霍汀詩草後序  
華州史寶徵撰

穎川先生宿儒耆德味道耽書苜蓿冷甌怡然自得訓士之暇吟詠陶情其詩不事規摹自抒胸臆又精繪事嘗畫羅漢寫蝴蝶白拙美人題詩其上得者珍之性愛菊賦白菊句云淵明有意留高格

剩得秋容斗室中詠瓶菊句云一枝那許隨秋老

獨傲嚴霜莫與同借物寓懷可想其翛然高致矣

先生令子平軒比部治與余爲會榜同年乙未平

軒典試江西余充內監試官闈中樂數晨夕話及

秦中詩人平軒使還以三原劉九畹紹欣所輯二

南遺音見寄竝獲讀先生崔汀詩草因識數語於

詩草後復摘其警句錄入此卷聽松廬詩話

先生長子振菴孝廉鴻亦喜爲詩嘗詠玉蘭句云

莫向沅湘誇九畹瓊姿原不染塵埃道骨仙心知

非久戀人間世者同上

摘句 未能辭散秩只爲慰高堂

峯頭響徹空潭水松外飛來眾壑雲

崆峒山

馳驅甫就三千路投止頻尋四五家

捧日立身超世界撥雲屈指數山川

六盤山

寐後神遊天地外覺來意在有無中

身閒整日誰相問書滿匡牀獨與親

張開東

字白蘊湖北蒲圻人

白蘊坐隻輪車遍游五嶽北踰朔漠東眺滄溟畢

秋帆中丞題海嶽游人四字贈之

考田詩話

白蘊天才敏贍詩逾萬首其興會所至但覺滿紙

性靈一片天籟有不可以繩尺拘者

同上

白蘊詩如迴車巷云相如不畏秦乃畏廉將軍出

殺虎口云殺虎口前風烈烈忽然爲雨忽爲雪謁

閔子祠云不仕季孫易承歡後母難喻石農極稱

賞之

聽松廬詩話

摘句 日色三關遠風聲萬里來

九河重渡日五嶽一歸人

華蓋垂天張北斗黃河劃地鎖中原

但聞衆鳥春相語不辨何花風自香

海閣天涯同一望故人杯酒自千秋

蓬萊閣

呂堅

字介卿號石颿廣東番禺人貢生有遲刪集

石颿工詩古文辭爲諸生時李南潤見其詩奇之  
由是得名性兀岸自異少所許可豪於飲高談雄  
辯四座皆驚家貧甚然胸次落落無所介雖簞瓢

屬空笑傲自若也大興朱石君相國蒞粵粵之名  
士咸被延接而石颿與二樵尤見稱許顧瞻躋名  
場老而不遇磊落抑塞之氣時發之于文與詩幽  
豔陸離奇情鬱勃不肯作一常語所著遲刪集六

卷文附焉

嶺南四家詩鈔

嶺南四家石颿最後歿張黃黎兼工書畫呂遜之

呂爲古文張黃黎亦不能及也

玉壺山房詩話

阿堅番禺諸生也少矜風調好辭賦狎山槩澗落  
落於世情性寡歡而多恨家貧倦遊連蹕于有司  
生平死友履迹於黃泉非文何適

遲刪集

呂石飜有絕句云一年一見一愁予多病心情懶  
著書千里月輪分半片卿持青桂我蟾蜍可謂豔  
情奇想聽松廬詩話

標題

越臺四首

七古

五百四峰草堂詩刻成余

遲刪集亦鋟板醉占長句兼調二樵

七古

摘句

素娥東死三更月黑水西流萬里河

賣書鑄劍酬知己碎錦裁詩贈美人

風兼水氣送殘雨樹減夕陽停片雲

國朝詩人徵略卷四十六



國朝詩人徵略卷四十七

番禺張維屏子樹輯

法式善

本名運昌奉

旨改今名字開文號時帆蒙古人乾隆四十五年進士官  
侍讀有存素堂稿

時帆自登仕版卽以研求文獻宏獎風流爲事在  
詞垣著清秘述聞槐廳筆記在成均著備遺錄其  
餘有資典故著而未刻者甚多所居在厚載門北  
背城面市一畝之宮有詩龕及梧門書屋室中收

藏萬卷間以法書名畫外則移竹數百本寒聲疎影翛然如在岩谷間經師文士一藝優長莫不被其容接爲詩質而不癯清而能綺故問字求詩者

往往滿堂滿室

湖海詩傳

學士以詩文爲性命意氣爲雲霞宏獎風流主持名教者幾三十年接跡西涯允無愧色詩清醇雅

正力洗淫哇

羣雅集

王鐵夫最賞法時帆祭酒淡花開不濃之句余則喜誦黃葉打門響青山生暮寒一語因論詩清如

先生可謂清到骨矣

香石詩話

時帆用漁洋三昧之說言詩主王孟韋柳又工爲  
五字一篇之中必有勝句一句之勝敵價萬言嘗  
刻其詠物詩一種予偶弗之善遂止不行

楊甫求定業

丁卯余寓都門秦小峴侍郎招同時帆學士暨諸  
詞人拜淮海先生像越日學士過余寓齋茶話良  
久且曰朋好多在城南吾常出城子勿拘往還之  
禮吾所居甚遠也其待人溫厚如此旬餘余乃報  
謁主人出城余入其室庭戶翛然新綠侵簾古書  
插架爲褰裒久之歸途過李公橋望積水漣漪令  
人想見西涯之流風焉

聽松廬  
文鈔

時帆先生索余詩欲選人詩龕及見錄余方欲改  
定數十篇覓人寫正與之會偕友南旋念促未果  
後因便寄去一帙未幾聞先生歸道山令嗣亦下  
世所寄詩不知入目否及見錄一書聞未刊行今  
不知歸於何所也

聽松廬詩話

但有梅花看何妨長閉門地偏車馬少春近雪霜  
溫老剩書藏簾貧餘酒在樽說詩三兩客往往坐  
燈昏此梧門學士詩也蕭寥澄澹如見其人

同上

標題

遊西山宿秘魔崖

五古第一首

摘句

自古情至語中必無色澤

萬樹已秋色一蟬猶苦吟

埽地畱殘月推窗放懶雲

鐘聲止羣籟酒力入新詩

亦是人間語塵埃一點無

讀王鐵夫詩

貧賤交心易文章造命難

馬老漸忘瘦鶴饑時得閒

兩三竿竹自秋色千萬疊山皆雨容

### 謝振定

字蘇泉湖南湘鄉人乾隆四十五年進士官監察

御史有雲將山草

薌泉在御史臺巡城適道遇勢家奴車服侈麗且  
相抗乃縛而鞭之焚其車事聞吏議弗善也既罷  
官性好山水爲東南汗漫游所至士大夫虛左迎  
之酒痕墨瀋中獲其寸紙珍爲拱璧

湖海詩傳

摘句 宵寒燭屢跋瑣碎誦新句

雨足分秧水風清曬麥天

吳蔚光

字愬甫號竹橋江南昭文人乾隆四十五年進士  
官禮部主事有素修堂集

竹橋初登詞館繼改儀曹志尙幽閒卽辭華臚旣

而喆昂總制湖湘門盈蘭錦而向禽之志彌專箕  
穎之情愈切覃研文史嘯傲湖山跌宕琴樽搜羅  
書畫且與門人鮑叔治等及女士席佩蘭屈宛仙  
弦詩讀畫粉墨淋漓故發爲著撰莫不刻羽引商

揚風屹雅

湖海詩傳

摘句 千古功名春夜夢半生交友曉天星

萑來綠酒堪爲國畫出青山可當家

半湖流水青通市十里垂楊綠到城

逢花客有畱連意對月人多太息聲

璫屑久憑妻與子荒唐終斥佛兼仙

紅雨半簾飛蛺蝶綠雲千葉蓋鴛鴦

錢塘

字禹美號學淵江南嘉定人乾隆四十五年進士  
官教授有鶴原詩草

塘成進士需次當得知縣自以不習吏事就敎職  
選授江寧府學教授專志撰述著律呂考文六卷  
又著史記三書釋疑於律厯天官家言皆究其原  
本而以他書疏通證明之律書上九商八羽七角  
六宮五徵九數語注家皆不能曉小司馬疑其數  
錯塘據淮南子太原經證之又以淮南天文訓一



篇多周官馮相保章遺法高氏注罕所證明作補  
注三卷晚年讀春秋左氏經傳作古義若干卷以  
補杜氏之闕且糾其謬所作古文曰述古編四卷  
皆行於世卒年五十有六

國朝漢  
學師承記

摘句 百年幾令節名士半離家

晚潮隨月上獨鳥傍船飛

程際盛

字煥若號東冶江南長洲人乾隆四十五年進士  
官監察御史有稻香樓集

東冶由舍人游歷蘭臺奉職三十餘年退食而歸

惟以汲古窮經爲務所著有說文古語考禮記古  
訓考周禮故書攷儀禮古文今文攷駢字分牋續  
方言補清河偶鈔皆有功于學者

湖海詩傳

摘句

紅樹隱遙汀蒼烟辨嵯屋絕壁聳千尋窈

窕結寒綠驚濤夜有聲觸石浪仍伏徘徊

沙月生泠泠葦花曲

夜泊燕磯

趙懷玉

字億孫號味辛江南武進人乾隆四十五年

召試賜舉人官青州府同知有亦有生齋詩文集

吾年十九省吾父於都門遂就京兆試二十娶金

宜人時吾父刑部君官京師汝叔父尙幼家頗餘錢太宜人每別儲錢一二萬令買書帖此爲最樂庚寅丁酉秋試皆爲病阻庚子應

純皇帝五巡召試旣入選閱卷者意別有屬欲易之南昌彭文勤公力爭得免又擢元暉仰合

上意由第七移置第三遂以內閣中書通籍甲辰薦不售癸丑仍躋南宮甲寅補中書庚申冬倅滿富陽師憐其積困長安注外用入都九載逋累如山旨甘難具不得已就外選山東青州同知在閣日久及爲郡丞同官每日爲迂僚屬則嫌其弱賴上官多

知己壬戌一歲中先攝登州繼權兗郡癸亥春葺  
青州廨破屋三椽雜蒔花木陳書其中甫得稍閒  
而滕縣徐盛氏之獄起鐫一級讞未上刑部君凶  
問至馳還青州九月杪謁蹶就道十一月初舟泊  
清河二壩猝遇湖廣估船觸擊破板水入纜斷漂  
至中流舟截爲二時予偕親友輩俱先往惠濟開  
眷屬則賴居民孫氏預救登岸身以外物盡付波  
臣乙丑上海觀察李君廷敬延葺宋遼史詳節歸  
營葬事丙寅阮撫部元伊太守秉綬延葺揚州圖  
經丁卯索佳鹽使額勒布延主通州石港講席在

石港六年頗爲諸生愛戴辛未秋陝西書來延主  
關中講席予遊跡未嘗至秦思一覽山川之勝孰  
知到甫月餘驟嬰末疾右手尙能作書甲戌決計  
辭歸明年正月抵家細數此生愆尤叢集聞見聞  
淺然不敢好名爲欺人之事亦不肯好奇爲欺人  
之學厭作生計別存遐心少卽喜爲詩文顧筆力  
平弱又牽率酬應多不足存間有存者易餅覆瓿  
聽之而已

亦有生  
齋集

本朝自汪堯峰姜湛園邵青門諸君子引有明以來  
數人爲正宗修飭邊幅選言擇貌桐城方靈臯雖

高識冠流厚力企古而波瀾鋒鏑未鑿聰明於是  
矜奇務博者起而摧之如褒衣博帶之儒舉動繩  
尺不能制遊俠之亂禁敵貨殖之多畜而能言之  
士範於軌物者蓋亦鮮矣先生獨不惑於貴勢不  
牽於友朋硜硜自立不厭不倦故集中所存無有  
雜言詖義離真反正者可不謂難歟

大雲山房集

京師士人各攜一壺一碟醲飲諧其聲曰蝴蝶會

亦有生齋集

耿湘門先生五十治棺趙味辛先生七十自題木

主皆達人也

松軒隨筆

趙味辛七夕詩云蜘蛛結網鵲成橋河漢無聲夜  
寂寥不是病餘貪久坐秋來第一可憐宵末句品

題七夕甚雋妙

聽松廬詩話

方蘭士

薰

病危以詩稿託趙

懷玉

鮑

廷博

金德輿

趙有句云一編真託命九死見交情

同上

趙味辛舍人贈高麗記室李喜明進士李承薰句

云萬里人來箕子國一家詩有建安風

同上

標題

君勿疑行

七古

流民行

七古

壯烈伯李忠

毅公

長庚

挽詩

七古

哭洪大

五古

讀綏寇

紀略

五古

題司馬文正公神道碑拓本

七古

潼關行

古

題文信國書

古

漢壽亭

侯玉印歌

古

摘句

堯舜皆至聖朱均亦大賢浮雲視富貴敝

屣輕河山未聞動顏色毋論興戈鋌邈焉

唐虞子庶比巢許肩

除官時有目登科歲有記雲烟倏過眼誰

復識姓字

三千蓄鍾乳八百儲胡椒豈知禍所伏早

爲識耆料

立身稍自愛人已目爲迂



春光先在水暝色欲歸樓

百年誰白首七夕易黃昏

逸次叔齊原有位讓開季札更無稱

仲雍墓

相逢竊位甘爲逸兄縱無良豈累和

柳下惠墓

史公位置還齊孟弟子門牆竟出斯

荀爽墓

張翰可因鄉味去陶潛竟以妹喪歸

孤真是貌貧誰託醫本無靈病亦奇攬涕

自爲朝野惜不徒風義友兼師

挽錢侍御禮

多病不堪兼作客思家況值久無書

百年爲客輕千里萬事關心逼五更

舉世人誰醒春夢此官我未補秋豪  
急流肯退斯爲勇清福能消卽是仙  
莫把江湖當平地收帆要在未風前  
紅顏自古難頭白黃絹今應付汗青  
眼中餘子容如許身後相知竟屬誰  
多少舊游登鬼錄青雲莫但羨飛騰  
最好光陰容易失兒童竹馬是神仙  
神仙也要填橋渡無怪人間風浪多  
柳外斜陽波底月都城東是小江南  
但有詩名尙千古可知人不在官尊

楊揆

字荔裳江南金匱人乾隆四十五年

召試賜舉人官四川布政使有桐華吟館詩鈔

楊舍人俊逸清新才兼庾鮑與其兄蓉裳齊名嗣以詞賦通籍珥筆機廷吟紅藥之翻階對紫薇於畫省摘華校藻倜儻不羣頃暫假遊秦道出大梁見投長句時蓉裳偕至而子雲穉存淵如秋塍輩俱在座中燈火樊樓畱連觴詠才士之盛真不減當日鄒枚也

吳會英才集

荔裳偕其伯兄才雄藻密世號二難蓉裳旣已黃

巾青犢著績岩疆而荔裳復出塞數千里耳目所  
見得未曾有蓋造化奧區久而必發而窮荒戰地  
自嘉州昌黎之後紀載無多天或借翰墨以發其  
奇兩君遭際洵非偶然宜閱之者如游絕域如讀

異書也

湖海詩傳

標題

題史閣部遺像

古七

同伯兄夜話感舊書

懷成一千字

古五

函谷關

古七

青海道中

古五

崑崙山

古七

星宿海歌

古七

番地雜

詩八首

古七

皮船

古五

路引篇

長短

摘句

伴侶神形影聲名夢幻泡

論才我愧居易積愛士公過韓歐陽

呈畢中丞

非時客至堪沽酒有用身閒合著書

談宜深屋忘宵永夢裏重衾戀曉溫

淒涼似送辭巢燕潦倒疑逢中酒人

以落卷寄

還亦齋

最憶羣真朝散後晚風閒煞好樓臺

### 陸樹英

字恆芳號春圃廣東高要人乾隆四十五年舉人

官鹽城知縣有醉霞山房詩鈔及塞嚶集

春圃未弱冠卽有詩名見知於李雨村學使宰鹽

城以水災望吏議行戍伊犁所過天山瀚海白草  
黃沙有所感觸悉以韻語寫之未幾賜環年僅強  
仕酒酣浩歌意氣猶不可遏其詩以塞嶠集爲尤

傑

嶺南  
羣雅

春圃天山一律前四句云奇山豈受中原縛走出  
窮邊始大觀羣峭摩天連不斷層崖積雪暑猶寒  
語頗雄健又有日月雪邊生五字亦奇警聽松廬  
詩話  
摘句 亂峰爲雪有一徑入雲無

馬與冰流爭路走人從風勢帶山飛

全家忽作重逢屢故里真同隔世看

喜低  
家作

楊倫

字西禾江南陽湖人乾隆四十六年進士官荔浦知縣有九栢山房稿

西禾德氣溫醇望而知爲儒者生平論學以不欺爲本主江漢書院七年門下多尊信之撰杜詩鏡詮實能照見古人心髓足與朱鶴齡上下

湖海詩傳

楊進士博極羣書早傳聲譽與孫淵如洪稚存徐尙之輩倡酬最富邇年主講江漢公餘談讌出觀

所著杜詩鏡詮知其得力於少陵者深矣

吳會英才集

西禾論詩有云高卑辨詩派升降繫世風唐宋界

不分此論殊未公得毋所習偏護短慮見攻護短

慮見攻一語古今才人學人多不免此病聽松廬詩話

標題 小除日送孫淵如之句曲七古 關吏坐七古

摘句 夏蟲難語冰蜀犬多吠日

陳思好譏彈少陵勤改定無矜萬篇富每

爭一字勝

東粵兩奇人臣佗與冼氏

名山著述閒中富逆旅知交分外深

鵝嚇尙疑貪腐鼠鵬游真欲效冥鴻

江漢雙流天際湧樓臺三楚鏡中看登大別山



汪學金

字敬箴號杏江江南鎮洋人乾隆四十六年

賜進士第三人官左庶子有靜厓詩初稿

杏江爲持齋少司空哲嗣襟情旣勝才調彌嘉標  
格則玉樹瓊枝詞賦乃金荃蘭畹旣由詞館游陟  
宮僚請假南還營靜厓小築水竹彎環樓臺窈窕  
梵磬龕燈儼然世外朋舊中如武林潘侍御庭筠  
同之餘人莫逮也

渤海詩傳

摘句 西風吹易水落日下滹沱

亂鴉先客宿歸雁入春聞

新綠簾櫳春去後  
淡黃庭院月來初

山鷓數聲松葉雨  
溪蟬十里藕苗風

少年濁世佳公子  
垂死清流舊黨人

侯朝宗廟

國朝詩人徵略卷四十七

國朝詩人徵略卷四十八

番禺張維屏子樹輯

惲敬

字子居號簡堂江南武進人乾隆四十八年舉人  
官知縣有大雲山房文稿

先生幼學於父少長從舅氏鄭環夢楊遊然持論  
好獨出己見長老皆驚異焉中式乾隆四十八年  
癸卯科本省舉人五十二年充咸安宮官學教習  
時同州莊述祖珍藝莊獻可大久張惠言臯文海  
鹽陳石麟子穆桐城王灼悔生先後集京師先生

與之爲友商榷經義古文而尤所愛重者臯文也  
五十五年教習期滿以知縣用五十九年選授浙  
江富陽縣知縣臯文爲序以送其行其略曰夫爲  
令之道六經孔孟之所述皆子居向時之所道也  
以子居爲之其不可以至耶曰吾不爲彼之所爲  
而已豈子居向時之所道耶君子出其言則思實  
其行思其行則務固其志固志莫如持情實行莫  
如取善子居勉之矣先生曰善敬敢不求從良友  
之規旣至富陽銳欲以能自効矯然不肯隨羣輩  
俯仰大吏憚其風節欲裁抑之令督解黔餉先生

曰王事也怡然就道返自黔中調知江山縣父喪  
去官時嘉慶元年十一月也四年服闋入都謁選  
明年四月選授山東平陰縣知縣引

見改授江西新喻新喻吏士素橫藐視官長先生至懲創  
之人疑先生之爲治過猛也已乃進其士之秀異  
者與之講論文藝斷事不收聲必旣其實士民懷  
德畏威翕然大變於其舊七年張臯文歿於京師  
先生聞之慨然曰古文自元明以來漸失其傳吾  
向所以不多作古文者有臯文在也今臯文死吾  
當并力爲之先是臯文與今禮部侍郎仁和湯公

金釗講宋儒之學是時先生方究心於黃宗義明  
儒學案有所見輒筆記之未及與臯文辯論往復  
也及臯文卒先生爲書與侍郎其略曰濂洛關閩  
之說至明而變至

本朝康熙間而復其變也多歧其復也多仍多歧之  
說足以眩惑天下之耳目姚江諸儒是也多仍之  
說足以束縛天下之耳目平湖諸儒是也二者如  
揭竿于市以奔走天下之人故自乾隆以來多慙  
置之慙置之者非也揭竿于市者亦非也彼此之  
相冒前後之相搏益非也夫所謂濂洛關閩者其

是耶其揆之聖人猶有非是者耶其變之仍之者  
是非其孰多耶知其是非矣何以行其是去其非  
耶蓋先生嘗自言其學非漢非宋不主故常故其  
說經之文能發前人所未發十年調知瑞金縣瑞  
金在萬山中俗好訟鬪素稱難治先生張弛合宜  
吏民咸就約束有所論決問法何如不可干以非  
義瑞金諸生楊儀招倚富姦逼佃戶女事發到官  
願進千金求脫罪先生峻拒之後屢邀人關說至  
以萬金相啗先生曰吾自作令以來苞苴未嘗至  
門今乃有此豈吾有遺行耶卒論如律先生廉名

素著至是人益信之十五年大吏以先生治行第一保舉卓異十一月至京師明年回任是歲刻大雲山房文稿成又明年守南昌府吳城同知十九年以姦民誣告家人得贓失察被劾黜官先生爲人負氣矜尚名節所至輒與上官忤上官以其才高每優容之而忌者或銜之次骨先生旣擯不見用士大夫之賢者咸爲先生惜而先生不以介意益務爲文自壯初先生之再謁選也石橋灣故居已奉其先府君遺命讓兩從父居之自挈兩弟奉鄭孺人之官至是假館所親無寧居屬有門下士



官安慶知府試往謀之道遇疾歸歸寢十日而卒  
先生生於乾隆二十二年丁丑二月初一日卒於  
嘉慶二十二年丁丑八月二十三日春秋六十有  
一先生既卒之三月余始從其嗣子穀求遺書得  
大雲山房文稿都若干卷外集及詩詞各若干卷  
歷代冠服圖說未成其治獄別有子居決事四卷  
先生之治古文得力於韓非李斯與蘇明允相上  
下近法家言敘事似班孟堅陳承祚而先生自稱  
其文自司馬子長而下無北面先生所欲有爲於  
天下者具見文集中以在下位不獲有所施設然

後之人讀其書足以知其志之所存也

初月樓文鈔

### 大雲山房文彙通例

一 襍著文古多自書子或書氏書字集中皆書字  
序記文古多自書名或書余或書愚集中皆書  
名碑志文古多自書名傳後論或書字或書名  
集中皆書論曰不書名與字

一 大傳本史書體故韓退之傳陸贄陽城不入本  
集後人有入本集者或自存史彙或爲史官擬  
彙而已集中無大傳其小傳外傳傳中必書名  
祖父及傳中所及之人雖貴且賢必書名祖父

賢始見子孫亦然妻妾有故始見傳非碑志能  
也官與地必書

本朝之名紀實也

一大傳書名書字不書號史法也儒者於傳中事  
別書稱某號先生亦史法也外傳小傳或書號  
或書別號道號著性情也古者幼名冠字故於  
名下書字世人加字於名上者非也集中名字  
并書者字皆在下號或取地或取所居世人稱  
號而加於名之下亦非也集中名號并書者名  
皆在下別號如漫郎醉吟先生道號如華陽真

逸無垢居士集中有故則書

一傳目自漢書以下皆書名史記或書名或書字或書官或書爵集中家傳皆書號書先生外傳小傳皆書字或書人所稱如曹孝子是也

一碑志文較史傳例稍寬集中凡文中所及之人書某官某姓公或某姓君再書名其滿洲蒙古不紀其氏者書某官某名公或某名君用元色目人例也紀其氏者書如漢人

一碑志文目書階官書職官書爵書諡此通例也古人集多不畫一集中止書職官其階爵諡於

文中見之書石則目具階職爵諡用當時法也  
一集中碑志文目監司以上書公以下書君成一  
家學者書先生所尊書府君友書字婦人書所  
生之姓姓所以別女子也其夫之姓文中見之  
一集中碑志文目止書某公某君某府君其妻之  
合葬者文中見之以合葬志非古法也祔葬志  
書祔葬從夫之義也

一集中遺事迹書法如碑志行狀行略書法亦如  
碑志書事之書法如傳

一墓表有列銘及詩者變例也集中皆不列銘及

詩碑記列銘及詩者正例也集中皆列銘及詩  
壁記則無之其壁銘有序者書并序以別於壁  
記也

一碑志文有序有志有銘記作文緣起序也記事  
及葬年月志也詠歎之銘也集中志文有作文  
緣起者目書并序餘不書其有志無銘者目止  
書志志略者目止書銘碑文皆書碑銘不書并  
序碑以無序爲正例也

一碑志文書甲子則不書日數書日數則不書甲  
子正例也集中有書日數并書甲子者必有大

美大惡焉以之別疑表信變例也

一集中碑志文書始遷祖及曾祖以下其高祖有功德則書書母書前母繼母生母不書曾祖母祖母其書者變例也書妻書子書女不書孫以孫應書其父之碑志也有故則書集中有應書之人而不書者必有當絕之道焉此春秋之義也傳文中亦用之

一集中碑志文必書葬日月及地不書者乞文時未卜日月及地也必書曾祖以下及官名其書某官某名止從某某者狀失體不官不名或失

體不及其上世也

一集中碑志文尊祖以下有官者書職官卒後贈職官亦書至子孫貴封贈官止書階官以不治事也

一集中傳文止書某年進士舉人不書某科史法也碑志文書鄉試中式會試中式

殿試

賜進士及第出身同出身詳之也

一集中序文地名據今時書之官名亦然其或書古官者以世多以古官稱存當時語也碑志文



中述人言書古官亦存當時語也書尺牘皆與  
序文同詩詞目亦同記文不書古官紀實也

一集中書上書目皆書姓書官座主舉主及所受  
業稱先生其目書官文中書先生者非所受業  
也友書字其書諱者或其字不著或其字不應  
古法如號之取地取所居也漢人友稱字唐人  
稱行宋人稱官於所學稱號自明以來及門俱  
稱號矣時爲之也

一集中書上書首必書某人閣下足下執事末必  
書某月日某謹上以別於尺牘也

一史記漢書載四言時歌行晉唐書以後載五七  
言古近體詩此史法也文家載詩則格下集中

載詩者皆入外集詞曲不載

大雲山房文稿

古文體例有有定者有無定者然必先明於有定  
而後可以言無定明以來金石之文往往不放古  
法漫無矩度是體例不可不講也如潘氏昂霄之

金石例王氏

行

之墓銘舉例黃氏

宗義

之金石要

例皆援據賅洽辨論精詳治古文者所當攷究至  
惲子居自爲文集通例不過一家之言然亦足見  
其矜慎不苟且條列簡明亦足爲初學治古文者

之一助也

臆松廬  
文鈔

聖人治天下必有以合乎人情之所宜是故中制者聖人之法也其不滿乎中制與越乎中制之外者于人情苟不至甚不便聖人必不違之此三代之道也聖人之治天下有二倫物之紀名實之效等威之辨授之以一成之式齊之以一定之法若其質文之尚奢約之數或以時變或以地更故養生不至于拂戾趨事不至于迂回彼諸儒博士者過于尊聖賢而疎于察几庶敢于從古昔而怯于赴時勢篤于信專門而薄于攷通方故其爲說也

推之一家而通推之衆家而不必通推之一經而

通推之衆經而不必通至不必通而附會穿鑿以

求其通則天下之亂言也

大雲山房文稿

惲子

於三代之制能提其要能會其通洵屬通人之論  
茲撮其立論之大指如此

蘇子由曰古之君子不用於世必寄於物以自遣

敬之庸劣不敢附於古之君子露竊微祿近二十

年不敢謂不用於世然今之天下人才衆矣任鈞

軸者有人任彊場者有人任河渠者有人任漕輓

者有人任百執事者有人皆循循然奉功令赴期

會較其貴賤則有相懸者矣論其賢不肖之相去

其間豈能以寸哉是何也世尊則才勝法世治則  
法勝才太平既久無異政無殊俗豪傑與凡庸同  
功正直與詭隨並譽如洪鑪熾則金鐵雜投而皆  
鎔大海泛則淨穢疾下而同化也若是則敬雖服  
卑官三十年豈敢謂用於世卽等而上之再等而  
上之又豈敢謂用於世哉若是則寄於物以自遣  
之說敬何敢辭焉

同上

史記漢書有排比數千言者其後必大震蕩之東  
坡司馬公神道碑虛在前實在後所以如此者因  
一切相業不足以盡文正故竭力推闡在前後列

數大事止閒閒指示如大虛中浮雲此文正人之  
大東坡手筆之大也同上

國朝古文論者多推望溪方氏苞前乎方氏者有侯

方域魏禧汪琬姜宸英朱彝尊邵長蘅諸家後乎

方氏者有劉大櫟袁枚朱仕琇魯九皋彭紹升姚

鼐諸家而數十年以來則袁姚兩家為尤著子才

之文爽健近於肆矣然未足以言古人之肆也且

好為可喜可愕以動人目其流弊將入於小說家

姬傳之文謹嚴近於醇矣然未足以言古人之醇

也且拘守繩尺不敢馳驟其流弊將如病弱之夫

慙慙不振故就諸家而論愚以爲文氣之奇

叔子文體之正推方望溪而介乎奇正之間則

子居也諸家爲古文多從唐宋八家人惟魏叔子

惲子居從周秦諸子入而皆得力於史記夫善學

古人者非徒學其形貌貴得其神氣也非徒學其

文中之辭貴得其文外之意也叔子子居之文於

史記未嘗貌似而吾謂其善學史記者謂其得史

記言外之神法外之意也然世人貴遠而賤近推

魏叔子或以爲偏嗜矣至推惲子居或且以爲阿

好矣雖然文章公器願與知言者共審之

聽松廬文鈔

嘉慶乙亥六月常州惲子居敬初至廣州一日葛  
衣葵扇訪余于城西一見如舊相識次年春子居  
卽度嶺北旋其寓羊城僅數月時余館西關外相  
隔重城亦未能數數把晤也一日謂余曰吾將爲  
文贈君以誌永好余曰微先生言屏亦願有請也  
先大母苦節數十年旣蒙

朝廷旌屏欲得賢而工文者爲文表諸墓以示後嗣  
敢以爲請子居曰敬諾不敢辭越日屏具衣冠奉  
行狀詣寓齋再拜子居於是爲撰黃太孺人墓表  
今載集中又一日過余談至日暮畱宿齋中因索



余古文稿觀之辱承獎許且勸併力爲之將行執  
余手曰子嶺外桺仲塗也他日文集編成作序者  
其惓子居乎孰意別後曾不二年遽聞微疾辭世  
古文一道失此良友每一念及輒令人意沮心孤  
不禁太息歔歔而不能自己也至桺仲塗集雖曾  
瀏覽實非所好且生平性情亦與之不類不知子  
居易爲舉以相況惜當時匆匆握別不暇詳矣上  
一日與子居飲酒酣余曰子之文必傳於後世無  
疑惟集中有牽引釋氏之言此種最爲可厭余他  
日爲子別刊一本當盡刪之子居曰佛遺教經云

若有人來節節支解當自攝心無令嗔恨支解且  
不恨況刪文字耶余曰子欲以酒解酒耶相與大

笑

松軒  
隨筆

余應童子試邑侯吳象川先生得余卷異之試竣  
因書扇及楹帖見贈時余年十三未有字先生署  
欸曰南山友臺後余入都見翁覃谿先生先生贈  
詩有云南山舊墨緣韶石響鳴絃蓋韶州有南山  
其峰曰鳴絃而余先世系本曲江故卽以南山爲  
號也自是凡交於余者皆號余曰南山獨憚子居  
不然其集中黃太孺人墓表及香石詩序聽雲樓

詩序皆稱余字而同遊海幢寺記則稱余曰柟山  
凡書來皆稱柟山不稱南山卽一稱謂之間亦必  
詳審如此上同

摘句 春風懶于人花枝日嬌情誰澆花間酒拆  
花眉上鎖

每於七椀風生後萬斛泉源筆下來

李符清

字仲節號載園廣東合浦人乾隆四十八年舉人  
官開州知州有海門詩鈔

載園性豪邁喜交游愛書畫所藏有杜少陵贈衛

八處士詩墨蹟因署所居爲寶杜齋杜文貞書罕

傳於世觀者無從證其真贋也

松軒隨筆

摘句 地遠迴孤鴈天低入百蠻

五年作令知官况四海論交得友難

李驥元

字鳧塘四川綿州人乾隆四十九年進士官編修

有雲棧詩稿

鳧塘詩有奇氣與兄墨莊工力悉敵

湖海詩傳

標題 七盤山

五古

白馬灘

五古

雪山關

五古

摘句 門棲唐代烟園種宋時樹

溫汝适

字步容號篋坡廣東順德人乾隆四十九年進士  
官兵部侍郎有攜雪齋詩鈔

汝适成進士改庶常授編修丁巳入直

尙書房擢贊善再擢洗馬侍講侍讀轉左右庶子遷  
國子祭酒太僕少卿通政使歷典廣西四川山東  
鄉試督學陝甘諄陞副都御史己巳監臨京兆試  
臨場條陳降補太僕正卿旋復副都御史癸酉擢  
兵部右侍郎甲戌以母老

予告南歸未幾居母憂哀毀成疾及痛聞

仁宗睿皇帝升遐急奔赴扶病就道兼程進發卒於江西  
吉安舟次年六十有七

上聞惻卹

賜其子舉人承悌進士汝适視學陝甘時以甘肅寫遠  
藏書絕少乃厚捐俸貲多購善本置書院中戊辰  
己巳間粵洋不靖汝适卽見聞所及剴切陳奏生  
平無他嗜好惟多蓄書公餘以書史自娛著有曲  
江集攷證曲江年譜攜雪齋詩鈔文鈔其未梓者  
有咫聞錄韻學紀聞日下紀游略藏于家廣東通志  
少司馬詩詞和氣平肖其人品嶺海詩鈔

標題

鄜海雪天風吹夜泉硯歌

古

荔枝有名

貴味者殼厚而粗味乃獨絕偶用東坡韻

賦之

古

摘句

星分鶉首秦關壯險關蠶叢蜀棧遙

歸路正尋金雁驛新詩遙寄碧雞坊

徐鑠慶

原名嵩字朗齋江南金匱人乾隆五十一年舉人

官湖北知縣加知州銜有玉山閣集

徐孝廉爲健菴尙書後人文筆高華稱其家世少

歲卽游秦隴兼涉伊涼其詩清激時露奇響梁谿

近日顧立方楊蓉裳荔裳皆足名家孝廉更拔戟

自成一隊其逸藻古豔擅青蓮昌谷之長

吳會英才集

朗齋刺史有絕句云家住梁谿楊柳邨山房細雨  
約開尊鴛鴦畔口桃花水一夜春潮綠上門最近

晚唐風調

聽松廬詩話

標題

陳畱行

五古

役夫歎

七古

述征篇

五古

摘句

主將不驕貴士卒同苦艱隨身十餘騎深

夜踰高山月黑蹊徑迷露宿叢塚間主將

且如此僕夫何時開

從軍

西風驅萬馬落木滿三關



酌酒勸行客異鄉無少年

新涼半牀月殘醉一簾花

有酒休辭連夜飲好花須及少年看

虛名麗六流傳遍下第江南第一人

癸卯省試

得解首後場卷損補一字被貼主司謝載二公刊其文曰麗六蓋闕中紅號也

余鵬年

原名鵬飛字伯扶江南懷寧人乾隆五十一年舉

人有枳六齋詩稿

伯扶嶽嵒歷落意氣自豪西踰秦隴南絕江漢壯

遊所至發爲詩歌莽莽蒼蒼筆力雄偉

懷舊集

摘句 一水與人爭大地兩山作鎮鎖斜陽

海內浮雲看倦眼中叢桂識初心

爲客歲時貧病裏寄人兒女死生餘

臘雪幾曾成水去唐花從未見春來

劉統基

字未山廣東歸善人乾隆五十一年舉人官訓導

有南石山房詩鈔

惠州詩人余所知者黃初陵

煇

趙渭川

希璜

及未

山如鼎三足

嶺南羣雅

舟維天柱險水比衆山高一夜潺湲裏行人夢亦

勞行人勞矣乃夢亦勞此加倍寫法

聽松齋詩評

摘句 秋來人易怨況乃久離家

十年宦況書千卷五夜齋心月一輪

李如筠

字介夫號虛谷江西大庾人乾隆五十二年進士官翰林院編修有蛾術齋詩集

同課諸君或篤於古或趨於時惟介夫參會其中  
央以古人之雄直運今人之婉約擢肝指腎轉成

渾融

傷甫未定稿

先生甲寅典試湖南與吟出先生之門先生一登

玉堂再典文柄沒年僅三十有二

懋術齋詩集序

標題 張睢陽南將軍合像

七古

臨清行

七古

摘句 蜂蜜不自飽蠶繭不自衣竭力娛他人辛

苦將何爲

人隨孤雁遠天到百蠻低

度大庾嶺

鷺鷥人共夢風水樹同聲

我註六經經註我人磨寸墨墨磨人

心長髮短中年恨親老家貧一第難

論文求是非爭勝識字無多怕問奇

贏得平安惟健飯生離骨肉坐微官

孫星衍

字淵如號季逵江南陽湖人乾隆五十二年

賜進士第二人官山東糧道有兩粟樓集

君幼有異稟讀書過目成誦及長補學生員與同里楊君芳燦洪君亮吉黃君景仁文學相齊袁君枚品其詩曰天下清才多奇才少讀足下之詩天下之奇才也遂相與爲忘年交

厚經室集

乾隆丙午科大興朱文正公典試江南文正在都與彭文勤公約曰吾此行必得汪中孫星衍公搜落卷得其經文策曰此必汪中也及拆卷得君名

區卓言ノ後再卷四ノ  
而汪實未就試上

己酉散館君試厲志賦用史記駒駒如畏和相國  
珎疑爲別字置二等引

見奉

旨以部員用故事一甲進士改部或奏請畱館時相國知  
君名欲君屈節一見君卒不往曰吾寧得

上所改官不受人惠也遂就職又編修改官可得員外前  
此吳文煥有成案或謂君一見相卽得之君曰主  
事終擢員外何汲汲求人爲自是編修改主事遂  
爲成例補刑部直隸司主事總辦秋審君所居埽

室焚香爲諸名士燕集之所高麗使臣朴齊家入貢在書肆見君所校古書特謁君爲君書問字堂扁賦詩以贈

同上

相國阿文成公大司寇胡莊敏公皆器重君每有疑獄輒令君依古義平議行君執法求平所平反全活甚多

同上

五十九年京察一等次年五月奉

旨授山東兗沂曹濟道嘉慶元年七月曹南水漫灘潰決單縣地君偕按察使康公基田築塞之君鳩工集夫五日夜從上游築堤遏禦之漕歸中浚不果橫

決康公語君曰吾治河數十年未見以決口能卽  
堵閉者惟曹南之役吾與君成之省

國家數百萬帑金矣

同上

權臬七越月平反數十百條活死罪誣服者十餘  
獄亦不以之罪縣官云縣官實不盡明刑律皆幕  
僚誤之也

同上

山東衛河經臨清閘口夏秋水漲高於閘內之汶  
水卽閉閘謂之悶口糧艘阻滯君知德州哨馬營  
及恩縣四女寺舊有兩支河合流入老黃河卽鈎  
盤扇津故道經樂陵至海豐入海請開濬以洩衛



水異漲

上同

十二年六月署布政司印值部使廣少司寇興在省按章供張煩擾君慎守帑項不肯妄支事竣北行君獨無所餽後廣以賄敗豫東兩省以支庫獲罪者衆君不與焉

上同

君嘗病古文尙書爲東晉梅賾所亂官刑曹時卽撰集古文尙書馬鄭王注十卷及逸文三篇歸田後又爲尙書古今文義疏若干卷積二十餘年而後成其餘撰集有周易集解十卷夏小正傳校正三卷魏三體石經殘字攷一卷倉頡篇三卷孔子

集語若干卷史記天官書攷証十卷寰宇訪碑錄  
十二卷平津館金石萃編二十卷孫氏家藏書目  
內編四卷外編三卷續古文苑二十卷問字堂文  
稿五卷岱南閣文稿五卷五松園文稿一卷平津  
館文稿二卷古今體詩若干卷其所校刊者有周  
易口訣義六卷尙書攷異五卷春秋釋例十五卷  
孫子十家注十三卷元和郡縣志四十卷景定建  
康志五十卷唐律疏議三十卷其餘篇簡小者不  
可勝數君以嘉慶二十三年正月十二日卒於江  
寧距生於乾隆十八年九月初二得年六十有六

君妻王夫人名采薇工詩善書早卒君訂其詩爲

長離閣集

同上

秋帆撫軍刻惠徵君易漢學九經古義禘說明堂  
大道錄古文尙書攷諸書皆淵如爲之校定秋帆  
撰山海經校正亦藉其蒐討之力其學以漢魏詁

訓爲宗鉤深索奧孫穀董悅所弗能逮

湖海詩傳

觀察清真灑脫好游揚後進僑寓白門座客恆滿  
有陳太邱之風嘗與余論一前輩曰彼之不愛才

畢竟自家才識有限耳

羣雅集

淵如觀察詩云千杯酬我上北邙不及容我生前

狂千言相思寄行路不及逢君得君怒又云獸鑑  
紅深三寸灰那信急雪凌春來停歌出戶一驚顧  
醉影忽落瓊瑤臺此觀察中年以前詩頗有太白

神氣

聽松廬詩話

標題

人蓬壺洞

五古

冠山堂夜飲歌

七古

送邵

二雲閣校入都

五古

摘句

靜懷鴻荒始遠覺身世細

仙花積疑雪風鶴落如雲

紅燭照顏年少去碧山回首昔游非

相逢馬上成今雨歸去鷗邊有故鄉

一度落如人小別暫時圓比夢難成月景

八百孤寒連夜接千秋四部一言開朱竹君

一代識君非冥莫千秋得我是相如得古文

日孫喜與予小名同日占一律

### 顧敏恆

字立方號笠舫江南無錫人乾隆五十二年進士  
官蘇州府教授有笠舫詩集

立方與蓉裳州牧競秀梁溪以顏謝擬之楊則鏤  
金錯翠顧乃初日蓉蓉也性喜簡默不欲以議勝

人然一義偶抒彌形雋永

吳會英才集

笠舫少游貴池代人撰昭明太子廟碑袁子才見

嘆爲六朝高手後知笠舫文驚喜嘆絕

珠湖草堂筆記

往與君鄉人楊永叔劉簡之論及梁溪詩人咸推

君爲第一

懷舊集

標題 牧牛詞 采茶詞 伐木詞 賣花詞古七

摘句 貧疑天地窄嬾覺聖賢難

身閒轉覺心難靜家近翻憐夢未成

曉寒可耐春衾薄殘醉方知昨酒濃

那知似笑原非笑未到言愁已欲愁

桃花紅雨梨花雪斷送春風又杜鵑

何道生

字立之號蘭士山西靈石人乾隆五十二年進士  
官九江知府有方雪齋集

蘭士詩風骨清蒼如千金戰馬騰溪注澗無所不  
宜山西自澤州相國以來若蓮洋居士清妙則有  
餘排冪則不及也

湖海詩傳

蘭士取科第早入工部爲郎勤於其職其爲詩疎  
爽雄健出入昌黎劔南之間

楊甫未定稿

君尤善余有所譏彈應時改定

同上

君與兄覲農相愛同時爲曹郎相代爲御史

同上

蘭士詩云客子中夜興臥榻以車代瞑行就坦夷

鼻息出晻曖忽驚急雷響迸此夢魂碎石力拒輪

起如豆爆釜內車行石路數語善於形容

聽松廬詩話

蘭士又有句云乾坤清氣在在有不解領取真可

痛人生寂寞卽奇福斯世繁華皆大夢飲酒何須

舞歌侑講學莫爲鄒魯闕此真實語亦解悟語

同上

標題 青石梁

五古

岱廟飛來松歌

七古

摘句 此心苟無營是物皆不誘

士生天地間所寶惟我躬前後各萬古曷

以當厥衝



新寒正小夜覺初月衆星親

日蒸千嶂雪風鑄一河冰

一畫鴻溝秦晉豫幾番龍戰漢隋唐

漳關

親闌久隔心頻動宦海初游志已灰  
花光膩似人初浴我意懶于雲不流

國朝詩人徵略卷四十八

十四

國朝詩人徵略卷四十八